



Sesida dals

23 da favrer 2021

Communitgà ils

1 da mars 2021

Protocol nr.

160/2021

Dumonda Cantieni

concernent la garanzia dal svilup d'uffants pitschens

Resposta da la Regenza

La promoziun tempriva en la vegliadetgna prescolara pertutga ina fasa da vita decisiva per il svilup dals uffants. L'emprima plazza han en quest connex l'amur e la tgira genituriala. Plinavant è decisiva la cumbinaziun da tgira, d'educaziun e da furnaziun en il sector entaifer ed ordaifer la famiglia. Pervia da quai èn tut las persunas, en emprima lingia las persunas responsablas per l'educaziun ed ils conturns famigliars, ma er las persunas dal fatg cun contact direct cun l'uffant da purschidas d'assistenza e da sustegn e dal provediment medicinal, dumandads da porscher als uffants in ambient uschè bun sco pussaivel.

Ulteriurs posts senza contact direct cun l'ambient da l'uffant, sco per exempel las autoritads communalas u ils posts d'administraziun dal chantun, han l'incumbensa da promover cundiziuns generalas ch'èn favuraivlas per ils uffants e per las famiglias. Il chantun Grischun fa quai tranter auter cun il program ch'el ha inizià per metter en pe e per sviluppar vinavant la politica d'uffants e da giuvenils tenor l'art. 26 da la Lescha federala davart la promoziun da la lavur cun uffants e giuvenils ordaifer la scola (Lescha federala davart la promoziun d'uffants e giuvenils, LPUG; CS 446.1). Il program da la politica d'uffants e da giuvenils en il Grischun metta en quest connex actualmain il focus principal sin il sector prescolar.

Tar la dumonda 1: La responsabladad per prevegnir a situaziuns precaras han en emprima lingia las persunas responsablas per l'educaziun. Ultra da quai èn – tenor l'art. 314d al. 1 dal Cudesch civil svizzer (CCS; CS 210) – tut las persunas dal fatg obligadas da far in'annunzia, sch'ellas avessan d'observar situaziuns, en las qualas il bainstar da l'uffant è periclità. Per il sector prescolar cumpiglia quai èn spezial er las autoritads communalas, perquai che las vischnancas èn responsablas per quest sector. Plinavant han persunas privatas il dretg d'annunzia tenor l'art. 314c al. 1 CCS.

Tar la dumonda 2: Las basas giuridicas las pli relevantas per il sector da la protecziun d'uffants èn avant maun. Las pretensiuns da la societad envers la protecziun ed envers la promoziun d'uffants e da giuvenils èn cun il temp però er suttamessas a midadas che pon pretender ch'i vegnian fatgas adattaziuns. Cun il program da la politica d'uffants e da giuvenils e cun il punct central da svilup per promover structuraz favaivlas per famiglias curran actualmain projects che pon mussar il basegn d'adattaziun per la politica d'uffants e da giuvenils futura.

Tar la dumonda 3: L'onn 2020 ha il chantun Grischun fatg ina cooperaziun cun l'uniun "Kinderanwaltschaft Schweiz" per evaluar la posiziun giuridica d'uffants e da giuvenils en proceduras intrachantunals e per optimar talas en cas da basegn. L'uniun «Kinderanwaltschaft Schweiz», da la quala l'agir sa basa fermamain sin la Convenziun dals dretgs da l'uffant, n'ha exprimì nagina critica envers il sector prescolar dal chantun Grischun.

Tar la dumonda 4: Primarmain procuran las persunas responsablas per l'educaziun per il bainstar dals uffants. Sche quellas n'adempleschan betg resp. na pon betg ademplir lur responsabladad, vegnan engaschadas represchentanzas giuridicas. Plinavant èn las persunas dal fatg ed ils purtaders d'uffizis publics obligads da far in'annunzia, perquai ch'il bainstar da l'uffant vala sco spezialmain degn da vegnir protegì. Entaifer il chantun èn quai – tut tenor la constellaziun – l'Uffizi dal servetsch social per la coordinaziun da la politica d'uffants e da giuvenils e per l'obligaziun d'annunziar relaziuns d'assistenza, l'Uffizi per la scola populara ed il sport per la promoziun da la lingua e dal sport, l'Uffizi da sanadad per la promoziun da la sanadad u l'Autoritad per la protecziun d'uffants e da creschids en cas d'in suspect motivà ch'il bainstar da l'uffant saja periclità.

Tar las dumondas 5 e 6: En la planisaziun da las mesiras tenor l'art. 26 LPUG metta il chantun Grischun in focus impurtant sin la promoziun tempriva. Tranter auter vegn elavurada ina strategia chantunala concernent la promoziun tempriva. Il process d'elavuraziun è concepì uschia, che tant las vischnancas sco er las persunas dal fatg dal sector da la scola preliminar pon sa participar a quel.



En num da la Regenza

Il president:

Dr. Mario Cavigelli

Il chancelier:

Daniel Spadin